



partii naleraq

15.nov 2018

UKA2018/150

**Qanoq ililluta nunatta iluani timersornikkut pitsanngorsaallutalu ineriartortitseqqissinnaanerput pillugu apeqqutaat aallaavigalugu oqallinnissamik siunnersuut? Nunatta nunanut allanut unammisartoqarnerup tungaatigut inerisaajumalluta timersoqatigiiffiit nunatsinni pissartannorniuuttarnerit avataatigut nunatta iluani unammisaqattaarnerat akulikinnerulersinneqassapat taava qanoq iliuseqartariaqarpugut?**

(Inatsisartunut ilaasortaq Peter Olsen, Inuit Ataqatigiit)

Inatsisartunut ilaasortaq Peter Olsen Inuit Ataqatigiit, apeqquteqaat aallaavigalugu oqallissaarummik saqqummiussaqqarpoq tamannalu oqaaseqarfigissavarput.

Timersortartut atugaat nunatsinni nunaqarfinniikkutta illoqarfinnikkuttaluunnit ulluinnarni inuunermut assut attuumassuteqartoq aammalu sunngiffimmi inuppasuarnik sammineqartartoq sutigut tamatigut siuarsaaffigineqarnissaa aallunnerusariaqarparput.

Timersortartut ulluinnarni suliniarfigineqarnerat sunngiffimmi sammisalippasuarnik ingerlanneqartartoq ilisimavarput. Sungiusaasoqarnikkut allatigullu timersornerup ingerlanneqarneranut kateriffiusinnaasut annertusarneqarnissaa pillugu ilimaginngilarput maani inersuarmi assortuussutigissagipput.

Ukiuni makkunani illoqarfinni timersortarfiit ilaatigut annertuumik aserfallassimasut pigineqarput tamakkulu aqqiniarneqassappata Namminersorlutik oqartussat kommunillu peqatigiillutik pitsanngorsarneqarnissaat ilungersuuttariaqarparput. Uanilu akissuteqaammi takuarput 2019-mut ukiunut pingasunut timersortarfiit nutarterinissamut atugassanik 5.-millioner tamannalu iluarisimaarlugu oqaatigissavarput.

Taakkua naammangillat aamma nunaqarfinni timersortarfeeqqat aserfallassimasut ilanngutissappata aningaasat amerlineqarnissaat naalakkersuinut kaammattuutigaarput, tassami nunaqarfinni aamma ilaatigut sunngiffimmi sammisassat killeqarsinnaasartut eqqarsaatigalugit aningaasat amerlisariaqarput aamma tamannalu eqqarsaatigineqassasoq kammattuutigaarput.

Nunaqarfinni timersortarfeeqqat sanaartorneqassasut qineqqusaarnermi kingullermi assut tamatta Partiit ilungersuuppagut neriunniartalut tamatta asuli oqaluinnarata qineqqusaarnermi eqqartuktagut arlaatigut aallartissagigut sunngiffimmimi inuunermi atugassat pitsaanerulissappata timersortarfiliarnerit aallartittariaqarparput.

Timersortartugut nunatta avataani unammileraangata tamatta assorujussuaq attortittarpugut, kinaassuserput nunatsinnillu asanninnerput allerujussuuartarpoq, minnerunngitsumillu

kalaaliussuserput sakkortuumik itertineqartarluni, aammalu erfalatorput amuneqaraangat minnerunngitsumillu inuiattut erinarsuuterput appinneqaraangat nuannaarnerup qullii kuulertarlutik, inuiannullu kalaallinut annertuumik ataatsimoortitsilersarluni, tamannalu kingullermillu taamatut misigisaqarpugut assammik arsarnermi unammersuarnerit aasaq manna Nuummi ingerlanneqarmata.

Nunatsinni timersortartut nunatta avataanut unammiartortussanut siuarsaanissaq pinngitsoorsinnaanngilarput, pingaartumik aamma kinaassuserput nunarpullu nittarsaatissagutsigu. Taamaattumik oqallisaarisup saqqummiussaa assut soqutiginarlutut isigaarput tapersorsornartillugulu.

Aningaasalersuinissamat isumaqarpugut immikkoortitsisarnissat pinngitsoorsinnaanngikkigut, tassami nunarput timersornikkut avammut nittarsanneqassappat aammalu meeqqat nuannaartorisaaqarlutik timersornikkut ineriartussappata tamakkununnga allaat siuarsartariaqarpugut aningaasaliinerimmi utissaqqaarput inuit tamatta inuunerissaarnerulerutta pingaartumillu meeqqat inuusuttullu periarfissaat pitsaanerulersikkutsigit.

Timersoqatigiiffiit ullutsinni ilaatigut ingerlaniarnerat ilungersunarsinnaasoq takusarparput, illoqarfinni nunaqarfinnilu taakkununnga qanoq ikiussinnaanersugut aningaasalersuinikkut ilanngullugit eqqarsaatigisariaqarparput pinaveersaartitsinerit annertusarneqassappata.

Taamatut oqaaseqarluta isummagut saaqummiuppugut qujavugullu oqallisaarisumut Peter Olsen Inuit Ataqtigiit.

Hans Enoksen